

debuit. Vereor, inquam, ne Summi Pontificis Bulla quæ tunc cum Paternitas Vestra in Generalem erecta est fuit edita, de triennali potestate superiorum, nos cogat mutare superiorem, quod non poterit fieri in hoc statu rerum et temporum, sine notabili damno missionis. Sane is qui nunc præest R. P. Paul Ragueneau vere est in primis eximius et ut uno verbo dicam, omnibus numeris et partibus absolutus, qui non habet sibi hic similem, et nescio an in posterum habebit [*for habeat*]; cui missio multum omnino debet, utpote qui prudentissime, suavissime, fortissimeque hactenus eam gubernat. Is autem est status rerum et temporum ut existimem eum solum et unicum esse, qui possit eam nunc pro dignitate gubernare. homines enim multi sunt hic ex nostris viri sane religiosissimi et multis donis naturæ et gratiæ illustres, sunt tamen omnes, meo judicio, multis partibus illo longe inferiores, tum in omnibus aliis tum maxime in gubernandi ratione et vero nemo est qui ante gubernavit. Quanquam si necessario alius superior esset eligendus, non videretur debere assumi nisi ex iis qui hic sunt, non autem ex aliis qui harum regionum experientiam nullam omnino habent. Quapropter jam ab anno superiore scripseram ad R. P. <sup>Plem</sup> ut si fieri aliquo modo posset, continuaretur R. P. Ragueneau, in eoque situm esse momentum pro bono hujus missionis. Nunc autem ut existimo. Cauta [*sc. jacta*] est alea et expectamus hoc anno litteras, vel de ejus mutatione vel de continuatione.